

# Obraćanje visokog predstavnika Valentina Inzka povodom obilježavanja Dana Distrikta Brčko, 8. marta

Dame i gospodo,

Iznimno mi je drago što sam danas ovdje s vama da obilježimo 15. godišnjicu Distrikta Brčko. Također mi je drago da obilježavamo ovu godišnjicu u vrijeme kada Distrikt i dalje napreduje.

Želim naglasiti da je ono što se događa u Brčkom važno i za ostatak Bosne i Hercegovine. U prošlosti, Brčko je često služilo kao primjer šta se može uraditi u ovoj zemlji kada se izazovima koji se čine skoro nepremostivim pristupi maštovito i odlučno. Na primjer, formiranje vlade u Brčkom trajalo je samo 40 dana. Međutim, u nekoliko posljednjih godina, reforme u Brčkom su zaustavljene. To se mora promijeniti i nadam se da će Brčko ponovo biti primjer za cijelu zemlju. Suživot, sloga i pomirenje su tu na prvom mjestu.

Dozvolite da vas podsjetim da je Distrikt osnovan kao odgovor na situaciju u kojoj su sukobljeni ciljevi doveli do naizgled nerješivog političkog problema. Toliko je taj problem bio nerješiv da za njega nisu uspjeli pronaći rješenje u Daytonu.

Ali, problem se nije jednostavno mogao ostaviti neriješen. Zbog ljudi u Brčkom i zbog mira u zemlji kao cjelini, rješenje se moralo naći.

Rješenje se našlo u formi inovativnog i multietničkog ustavnog aranžmana kojeg su u velikoj većini podržali stanovnici Distrikta. Ovdje nije u prvom planu problem pripadnosti, u prvom planu su konkretni problemi, pa tek onda

konstitutivnost.

Institucije koje su stvorene u Distriktu Brčko omogućile su rješavanje strateških izazova na načine koji su i praktični i efikasni – te se tako odgovorilo na stvarne potrebe građana.

To nije loš model za ostatak zemlje, sve dok političke partije budu radile zajedno da učine život boljim za sve stanovnike Distrikta.

Posebno danas, kada – više nego ikada – postoji jasna i goruća potreba za novim političkim idejama.

Kao i ostatak zemlje, Distrikt se suočava sa stvarnim problemima. Ne moram nikoga podsjećati da je korupcija uvijek bila jedna od stvari koja najviše zabrinjava građane ne samo u Brčkom. A institucije Brčkog su imale različite rezultate u borbi protiv nje.

I uprkos činjenici da je Brčko uvijek imalo bolje ekonomske rezultate od ostatka zemlje – posebno kada je riječ o korištenju prednosti svoga položaja na Savi – nezadovoljstvo određenog broja građana lošim životnim standardom u poređenju sa susjednim zemljama ovdje je prisutno jednako kao i drugdje u Bosni i Hercegovini.

Upravo su zbog ovog sasvim razumljivog nezadovoljstva građani izašli na ulice Brčkog početkom prošle godine i zahtijevali od svojih predstavnika da počnu raditi produktivnije.

Građani će donijeti svoje zaključke o tome da li je taj zahtjev ispunjen. Treba ubrzati ekonomska kretanja. Budućnost jeste važna, ali građani žive u sadašnjosti.

Možemo se složiti da petnaest godina nakon osnivanja Distrikta Brčko, institucije Distrikta funkcioniraju, a građani kao rezultat toga uživaju veću sigurnost i određeno blagostanje.

Zadatak koji se nalazi pred predstavnicima građana Brčkog je isti zadatak koji je i pred predstavnicima građana u cijeloj

zemlji – povećati dosadašnje uspjehe, kako bi životni standard mogao rasti brže i puno značajnije.

Postignuća iz prošlosti pokazuju da je uspjeh moguć – moguć je u Brčkom i moguć je u cijeloj Bosni i Hercegovini.

\* \* \*

Dopustite da na kraju uputim srdačne čestitke povodom jučerašnjeg Međunarodnog dana žena građankama Distrikta Brčko i cijele Bosne i Hercegovine.

Uvjeravam sve vas da međunarodna zajednica ostaje opredijeljena da radi sa građanima ove zemlje na izgradnji prosperitetne i suverene multietničke demokratije.